

Situacion actual ta transforma detencion den curso pa perfeccion criminal

FALTA DI PRISON NOBO TA CREANDO SITUACION DESASTROSO

ORANJESTAD (AAN)—Na varios ocasion mandatarionan a bini Aruba pa tira un vistazo ariba e prison di Aruba. Añ ipasa tabata tin indicacion cu porfin algo lo ser haci. Pero mientras nos situacion ta empeorando, criminalidad ta aumenta. Mientras ariba tur tereno medidanan ta ser tuma, nada ta ser haci encunto un prison nobo pa Aruba. Mientras tanto presonan cu a ser deteni, ta keda warda di polis caminda celnan cu mester siribi solamente pa tene personanan pa algun dia, ta acomoda nan pa hopi dia. Na prison no por traha cu departamentonan na forma adecuado, no por brinda rehabilitacion y un situacion desastroso ta ser crea, cu ta haci cu detencion, en vez di significa rehabilitacion ta birando un curso pa perfeccion criminal.

Criminalidad y accion contra violador di ley penal, ta loke ta hayando menos atencion, mientras actual desaroyonan ta significa cu por spera umento di criminalidad, a base di e situacion social cu ta empeora.

No por kita for di vista cu e situacion social tin su impacto ariba comportacion, si comunidad mes no duna atencion debido na cierto asuntonan.

Den un situacion normal, na momento cu un persona comete un infraccion castigable contra ley, e ta ser deteni. A base di e caso, e por keda encarcela.

Pa un periodo e ta keda den un cel na warda di polis, pero solamente pa algun dia, comoquiera cu e celnan na wardanan di polis no ta equipa pa un estadia largo.

Despues di algun dia, pues, e detenido si e mester permanece encarcela pendiente tratamiento di su caso dilanti di Juez, e ta ser hiba prison, caminda mester tin facilidades pa rehabilitacion.

Den asunto di prison, tambe conoce por ejemplo prison pa esnan cu mester permanece pa un tempo mas largo cera, y esnan cu ta deteni pa un tempo corto.

Ademas den un prison normalmente ta tene cuenta cu e tipo di delincuencia cu a conduci un violador di ley dilanti di Juez, ta tene cuenta cu su edad, su sexo, etc.

Tur esaki segun un situacion normal, den cual

accento ta ser poni ariba rehabilitacion. Esey ta significa, cu e preso ta haya e guia necesario pa na momento cu e bandona prison, e por regresa comunidad y evita di bolbe comete e mes delito.

Den un caso normal pues, prison ta sirbi pa coregi esun cu a comete un violacion di ley.

Mirando e situacion actual na Aruba, mester bisa cu e ta leo for di normal y mas bien e actual situacion ta haci cu un detencion no ta sirbi e proposito di haci justicia, y brinda un persona e oportunidad pa mejora su pasonan. Mas bien den un situacion inhumano, inaceptable, ta creando un school pa criminalidad.

FALTA DI ESPACIO A BIRA UN MONSTRUO DI SIETE CABEZ

Na momento cu detene un persona den e situacion actual, e promer problema no ta con ta soluciona e caso. En vista di e actual situacion, e problema mayor ta, unda lo bay pone.

Tur sorto di areglo a ser abandona pa por acomoda presonan, despues cu prison a yena.

Si na cierto momento mester acomoda mas persona den un cel cu lo por ser considera normal, a yega e momento cu ni esey ta posible pa motibo cu simplemente no tin espacio pa pone mas

hende den prison.

Esey ta significa cu e presonan mester permanece den celnan na warda, cu awor a yena completamente.

Un monstruo di siete cabez a ser crea. Un preso na warda no por conta cu facilidadnan cu ta simplemente humano. Si na prison tin espacio pa hende cana, hala rosea, esta "lucht" manera e ta ser yama, algo cu ta necesario pa salud fisico y mental di un persona, esaki no ta posible na warda, caminda e preso ta keda tur dia den cel, apenas por move, y caminda e mester spera te na momento cu cuminda yega for di prison.

Ademas na e celnan na warda di polis no tin cierto exigencianan cu ta e caso manera na prison.

Warda di polis no ta equipa pa tene preso pa un termino largo y personal di polis tambe ta ser confronta cu un tarea extra, loke ta significa cu e situacion ta desastroso pa tur esnan involvi.

PRISON NO TA PRISON

Popularmente ta ser bisa cu Aruba tin un prison. Pero en realidad, Aruba no tin prison, pero un Huis van Bewaring, esta un cas pa detencion, un lugar caminda por acomoda esnan cu mester sinta pa castigonan corto di algun luna.

E construccion fisico di e prison na Aruba ta tene cuenta solamente cu e areglo cu tabata tin den pasado, cu esnan cu mester sinta nan castigo pa mas tempo, ta ser traslada pa Curacao.

E areglo aki a ser cambia, cu miras ariba un prison nobo pa Aruba y teniendo na cuenta e hecho cu hopi preso tabata perde contacto cu nan familianan debi na e hecho cu nan tabata ariba otro isla.

Na cierto momento a ser dicidi cu e presonan cu ta bay cera pa hopi tempo

ta keda Aruba. Huis van Bewaring a keda oficialmente pa nomber, pero a ser acepta cu e ta bay fungi como prison, aunke e no tin ningun facilidad di prison.

Un prison ta un lugar caminda e preso por siña un o otro ofishi pa ora e sali e por gana su placa. Ta un lugar caminda e ta haya tur guia necesario pa por cambia su rumbo di bida.

Pasobra na momento cu manda un persona prison ta mande un instituto di coreccion. E ta haya e oportunidad pa realiza su fayto, pa siña algo cu por yude ora e bandona prison.

Na Aruba nunca e facilidadnan aki a ser crea y mas bien e presonan mester sinta nan castigo pa despues nan sali y tene cuenta cu otro cosnan cu nan por a siña.

DEPARTAMENTONAN DEN PRISON

Un prison real conoce departamentonan, caminda ta dividi esnan cu a comete un infraccion contra ley.

Asina un preso joven cu a comete un crimen manera un robo chikito, no ta comparti cel ni departamentu di un psychopaat, esta un persona cu tin problemanan basico cu ta inducie pa comete cierto crimennan.

Falta di espacio ta haci cu na prison di Aruba tur hende ta ser cera hun-

to sin mucho distincion.

No tin un departamento pa joven, caminda ta trata na haci e jovennan mira kico nan eror ta, ta yuda nan escoge otro caminda.

E joven, cu talvez pa promer bez a participa na un robo, por ejemplo, por haya su mes den compania di un "maestro" cu por siñe tacticanan elabora y perfecto. Esey ta significa cu enbez cu prison yuda e joven subi un bon caminda, e joven ta haya oportunidad pa profundiza su mes den e oportunidadnan cu crimen ta brinda.

Ademas, contactonan por ser haci den prison, caminda personal mester biba den e limitenan limita di posibilidatnan y unicamente a introduci medidanan di seguridad, despues di e fuga masal di aña pasa.

E situacion ta desastroso, pero aparentemente ainda e no a haya e atencion cu e merece.

PAKICO PREOCUPA SI BO NO POR BAY CERA?

Mientrastanto pa esnan cu mester mantene ley, e falta di un prison cu espacio y bon equipa cu e posibilidatnan di rehabilitacion, ta ser sinti constantemente.

Un lista largo di persona cu mester a bay cera pa un o otro motibo, no por bay cera.

Na cierto momento un Sigui lesa pag. 10



RETINA STUDIO
Ennia Gebouw
4-Ora Pa servicio Rapido
di Labamento di Portret
di color
Calidad y Servicio

**SEA UN HOMBER O MUHER
CU CARACTER
BISA NO NA DROGA !!!
Accion Catolico pa Cuaresma.**